

5. oktober 2016

Nunarput tamakkerlugu kommunit suleqatigalugit angerlarsimaffeqanngitsunut angerlarsimaffiugallartussanik 100-nik sanaartornissaq qulakkeeriarlugu siunnersuummik aningaa-saleeriatsumik imaqartumik kingusinnerpaamik UKA 2017-mi Naalakkersuisut saqqummiussinissaat pillugu Inatsisartuni aalajangiiffigisassatut siunnersuut.

(Inatsisartunut ilaasortaq Mimi Karlsen, Inuit Ataqaatiit)

Utoqqarnut sammititanik siunissami pisortat sanaartortarnissaannut aaqqiissutissamik innersuussisumik Naalakkersuisut kingusinnerpaamik UKA 2017-imi nassuiaammik saqqummiussinissaannik peqquneqarnissaannik Inatsisartuni aalajangiiffigisassatut siunnersuut.

(Inatsisartunut ilaasortaq Ane Hansen, Inuit Ataqaatigiit)

Inatsisartunut ilaasortap Mimi Karlsen-ip aamma Ane Hansen Inuit Ataqaatigiit aalajangiiffigisassatut siunnersuutaanut Siumumiit imaattumik oqaaseqassuugut.

Siullermik qujassutigerusupparput angerlarsimaffeqannginnerup pimoorussamik eqqartorneqaleralluttuinnarnerani iliuussaasinnaasunik assigiinngitsunik ilaatigut inatsisartutigit oqaluuserisassanik qaqitsisoqartalermat.

Siunnersuuteqartup nammineerluni misissorneqareersimasuniik misissuisimaneranik tunngaveqartumik takuneqarsinnaavoq inissaqannginnerup pingasunngorlugu immikkoortinneqarsimanera. Inisseqqitat, angerlarsimaffeqanngittut, kiisalu inissaqanngittut.

Angerlarsimaffeqannginnerup inissarsiornerulluunniit tunngavii arlaqartut ilisimasagut tassaapput inissamik qulakkeerinninani illoqarfimmut allamut nuuttarneq, akiligassatigut ajornartoormi inigisamiik anisitaaneq, kiisalu pitsaanagerusumik angerlarsimaffeqarusunnermik tunngavilimmik allamik inissarsiorneq.

Siumumiillu aamma arajutsisimanngeqaarput inuuniarnerup akisunerujussuanik pissuteqartumik amerlasuutigit inuuniarnermi pingaarnersuisariaqarnermik tunngavilimmik angerlarsimaffeerus-

simasunik peqartoq. Taamaattoqarnera nalilersugassaammat tamatta nalunngilarput. Tassami attartortitsillutalu attartortunullu tapiissutinik tunniussuisarsimagutta nalusimanngilarput inuppassuit akilersinnaanngisaannik attartortitsisarsimalluta.

Isumaginninnikkut pisussaaffeqarnerput aallavigalugu Kommuunit qujanartumik inissiigallartarnek atoraat ilisimavarput. Tassa atukkatigut pitsaanerpaamik inissisimatitsinngikkaluarluni oqqiffigisinaasamik qulakkeerinnittoqartarpoq. Aammali oqaatiginngittoorneqarsinnaanngilaq inuk kinaluunniit inersimasoq inuttut killiffini aallaavigalugu nammineerluni najukkamini isumaginnittoqarfimmut saaffiginnittussaataammat.

Taamaammat siunnersuuteqartup siunnersuutigisamini pisai aallaavigissagaanni pisussaaffik annertoq Kommuniimmat oqaatigisariaqarpoq.

Siumumiit siunnersuut taamatut isikkulik akuerinngilarput. Aammali akuerinngilarput angerlarsimaffeqanngittut sutigut tamatigut immikkut isigineqarlutik allaat suliffissaminnik tunineqarumasarsimanninnerat allatulluunniit ikiorserneqarsinnaanngittut isigineqartarnerat Kommuunemi allami innuttaanertik pissutigalugu.

Naggasiullugu Inatsisartunut ilaasortap Ane Hansen Inuit Ataqatigiit siunnersuutaanut Siumumiit ima oqaaseqassaagut.

Siumumit isumaqarpugut utoqqaat pisinnaasut perusuttullu allatuulli imminnut naleqquttumik initaarsinnaanissamut piginnaatitaaffeqartariaqartut. Taamatuttaarlu Siumumiit pingaartipparput utoqqaat sapinngisamik sivisunerpaamik nammineq angerlarsimaffimmini najugaqartarnissaat.

UKA 2017-mi nassuiaammik Naalackersuisut saqqummiussissasut siunnersuuteqartut siunnersuutigisaanut oqaaserpassuit atunngikkaluarlugit matumuuna tapersiinerput oqaatigaarput ataatsimiititaliamullu susassaqartumut ingerlateqqinnissaanut tapersiilluta.

Qujanaq.

Jess Svane

Siumut

